

龍

江

夢

餘

錄

夢錄錄序

錄以夢錄名者得之心

而求之夢能真記夢中事

也凡晝之所思夜必有夢

皆慮慮以字精神所

極凡偶然而得者故夢賁
良弼而南道復興夢協
朕卜而周鼎肇建夢見
周公而冊述垂憲皆得於
心而示於夢者世道之汗

隆文章之顯晦係焉後世
若高唐有夢天門有夢
黃梁有夢則皆淫邪幻
妄恠誕不經害義傷教莫
此為甚予友唐龍江以青

年第進士獻際紛靡乃
乞疾南還養高於吳松江
上擁膝長嘯箕然有溪石
之趣於是欲以得於心者托
諸簡編將淑諸人傳諸後

也遂構室種竹為籓晦行
心醉經史倦則思睡凡夢之
所寓皆心之所得筆之於策
蓋其月矣間出亦予得
之若獲於驛然於之不忍

釋手事皆齏羹有據且欲
華就實化腐成新凡天
地之所以高深鬼神之所
以垂顯古今人物之所以
失草木昆蟲之所以變化

糗而錢穀甲兵激而道德
性教燦然畢具以垂于垂
世立教於正閭邪之志又
泯於言表噫是錄亦奇矣
以之泚人傳後將恆永有餘

謂此詩在少而盡出於夢筆
知龍以者哉龍江名錦字
士綱有風節此名不凡
以文章鳴世尤邃於理學
係於東南人少將來遠到

未可量也予愛慕之思如
工壽諸梓以誼同志者
更有所發揮云

盧龍郭經序

姜龍江夢餘錄

予自移疾家居杜門強過
泛無所事日令經史為偶性
嗜睡每晨盥畢即挾策
乾枕讀數十行已勦作

聲危輒復讀、久又睡、
去焉、焉蓋不知天壤間何
事、所以易此也、壬戌夏六月宿
病新瘥、厭城市器雜、云
聲乃遊署于龍江別業

其中歟得花石水竹之勝踈
曠自適真若忘世相忘者矣
或目与心會意緣境生輒引
筆伸紙裒所憶而志之月餘
積成卷帙不忍遂棄乃題

其首曰龍江夢餘錄而藏之
敝笥聊以志有得示無忘云
龍江居士唐錦題



龍江夢餘錄卷之一

雲間唐錦士網

王充論衡漢儒之所爭覩蔡邕王朗相與秘
玩以為異書予僭評之訂百氏之增虛詰九
流之拘誕其論固宏博矣然亦有不須辨難
而費詞殫力徒為哢者矯枉過正卒貽千
古非失其間孔篇詆孔子為貪官好仕刺孟
篇指孟子為禦人口給不亦尤繆妄乎及叙
述家世乃自稱鯀惡禹聖則又名教之罪人

矣

世謂韓退之性倔強頗任氣傲物予謂退之
乃婉慎人也特傲其所當傲耳如李杜二公
退之肯相傲哉觀其醉留東野詩云昔年因
讀李白杜甫詩長恨二子不相從酬司門盧
院長詩云高揖群公謝名譽遠追甫白感至
誠石鼓歌云少陵無人謫仙死才薄將柰石
鼓何調張籍詩云李杜文章在光焰萬丈長
平生千萬篇金薤垂琳琅又云我願生兩翅

捕逐出八荒夫退之文章唐以來一人而已
其詩豈盡出二公下哉乃推獎退避如此休
休之量可想矣其餘諸子不能免其嘲侮固
亦宜也何謂之傲乎

法書名畫特可資目前之玩耳於身心何補
哉好奇僻古之人類皆蔽精殫神於其間欲
以區區智力擅為已有患得患失唯日擾々
甚可笑也夫唐太宗之玉匣桓玄之輕舸王
廣津之複壁豈其秘惜有不至哉然竭天下

之力而不能守卒歸於狼籍散逸而已耳坡
公有云譬之煙雲過眼百鳥感耳豈不欣然
接之而去亦不復念也又如此乃可以言達
彼辨才者以死捍之亦愚矣哉

資格之法始於魏崔亮而復行於唐之裴光
庭是二子者當時固已罪之不待後世之譏
也庸流皆樂其寬謂之聖書殊不知豪傑之
士受抑多矣况復苛為之文迂為之格束縛
之爬擲之略不使少舒其志豈古人忠信重

祿所以勸士之意也耶漫爛蟠結卒不易更
使有賢相者出矯而正之則千載治道之疵
其有瘳乎

詩話云歐公一日被酒語子棐曰吾詩廬山
高今人不能為唯太白能之明妃曲前篇太
白不能為唯子美能之至於後篇子美亦不
能為唯吾能之也予以為非歐公之言也好
事者為之也夫三詩固佳使遇李杜尚當北
面听號令况能過之哉如或言出於棐殆非

所以愛其父也

月令雉入大水為蜃夏小正以為蜃者蒲盧也史芳卿又從而附會之以雉為丹鳥又引爾雅果蠃蒲盧即細腰蜂之說愚不敢以為然蓋雉與蛇自有相化之理埤雅云雉與蛇交則成蜃晉武庫有雉雛張華曰必蛇所化開視雉側果有蛇蛻夫海旁蜃氣成樓臺文也雉亦有文采故化而為蜃何足異乎先儒論管仲魏徵以為桓公兄也子糾弟也

故管仲之罪小予蓋甚惑焉夫桓公子糾固有兄弟之分自管仲視之既委質為臣唯盡忠所事而已一失其身即為不義豈宜去第就兄而忘其殺君之讎耶且魏徵殊非仲比初徵之為洗馬也高祖命之則徵固高祖之臣非東宮私臣也太子既死則復歸高祖以俟後命理也乃責以不死建成之難不亦誤

三
肅文豹論子美醉時歌云儒術於我何有哉

孔丘盜跖俱塵埃以百世帝王之師而儕之盜跖何止得罪於名教夫善與惡對故古人於聖狂薰蕕是非黑白之類恒對言之以此為罪恐子美得有詞矣

主父偃為齊相以受諸侯金赤其族宋時渭南縣有田夫得宿藏於土中金銀皆刻主父字嗚呼貪墨之徒雖千載之下穢跡尚存柰何後之人又從而蹈其轍也

支干之義漢宋諸儒各立異論予因參酌其

善者而定為一家之說云甲萬物孚甲也乙
陰氣尚強陽出乙乙也丙陰內陽外萬物炳
明也丁陽強不為主其勢適與陰丁也戊
也巳巳抑屈起也庚更也以陰干陽更而續
之也辛更故而新萬物成也壬陰始任也癸
揆也水土平可揆度也子滋也陽動物滋也
丑紐也萬物動有事也寅演也卯冒也萬物
冒地而出也辰震也陽氣震動也巳巳也物
巳起也午忤也陰忤陽也未味也滋味成也

申身也陰成體也酉就也老物收歛而成就也戌滅也陽氣滅也亥仰也陰氣已極故仰陽也

俗言東方朔乃太白之精黃帝時為風后堯時為務成子周時為老聃在越為范蠡在齊為鴟夷子皮嗚呼豈有是哉朔辨傳詆譭乃滑稽之雄耳特以覆射多奇中後世遂以為神相與創為悠繆之談而不自知其流於矯誣矣後漢光祿大夫郭憲著洞冥記亦云朔

毋田氏女夷年二百歲顏如童子生朔二日而死然世豈有二百歲生子者乎尤可笑也唐新記云右補闕綦毋旻著代茶飲序其畧曰釋滯消壅一日之利暫在瘠氣耗精終身之害斯大獲益則歸功茶力貽患則不謂茶災而劉孟熙霏雪錄乃云東坡作茶論曰除煩去膩一時之利暫佳削氣侵精終身之患不小畧不原其所自豈孟熙止見蘇論而未

讀新記歟

晉武庫災先聖履斬蛇劍王莽頭並焚焉楊
廉夫云聖人之履與逆臣之首並室同珎司
馬氏失芳臭之辨矣耳火之焚馘而有以累
吾履也其論甚偉吾夫子在天之靈有聞亦
將為之撫掌矣然元中統初徐世隆王惲劉
郁張著又嘗拜覲孔履于劉公學舍是豈晉
庫所藏之外別有流落人間者乎且春秋至
中統已千有八百餘歲縱兵燹不及亦當朽
腐盡矣豈得宛然獨存恐亦出於好奇者之

附會未可以為真也

張良傳浪沙之事良非獨免并免其客可謂
能矣先儒云天下苦秦無道莫不欲擊之故
有為良隱者真確論也後世乃疑良有隱形
之術若坊所謂遁者豈所以論良哉及其圯
橋之遇太史公班孟堅皆謂學者多言無鬼
神如良所見父老亦異矣是又真以黃石公
為鬼神也後世遂以山下孔穴為公之所自
出不經尤甚東坡曰黃石公古之隱君子此

論可以破千載之惑矣

歐陽詹乃韓公同年進士文詞雖不甚工而字法不佞其為人考之韓公哀詞可知矣而唐小說載詹惑於大原一妓為賦高城已不見况復城中人之詩卒為之死若然則所謂於慈孝最隆者安在哉又當時忌其才名者相誣耳今但以韓文為信可也

宋蘇才翁以書法獨步一時其草聖多得之懷素而黃山谷陳懶散又出於才翁也與蘇

子美齊名宋裕陵尤重之然深服文正范公
楷法之妙嘗求寫軋卦公以字數多眼力不
逮故以小楷寫伯夷頌歸之近見石刻於吳
中范家園極端勁秀麗無毫芒縱逸之態其
視浮佻之徒貴輕揚而賤持重者豈直睢陽
蘇合彈與蜚蜚糞丸比哉宋諸老皆題誌之
謂此書實為天下萬世綱常計非諛語也
火葬之說起於西域之夷俗慘毒不仁莫此
為甚故昔人比於炮烙之刑然施之僕隸且

不可況於親乎。魯不若喙之蠅蚋之為愈也。禮於先廟焚尚須三日哭。豈有燎灼其親之屍而仁人孝子乃能安於心乎。東南於今日為仁義禮樂之區。文物之盛甲天下。而此風流行。莫以為怪。不能用夏變夷。是亦士大夫之耻矣。然又在上之人所當峻防而嚴遏之也。姑蘇之俗至擲其殘骨於水。謂之水焚。此又有人心者所不忍聞矣。前郡守曹公鳴岐置義冢於六門之外。皆方百餘畝。而民之徂

於故習者猶自若也吁可恨哉

謝安屐齒折事先輩多譏其量之不洪獨楊
龜山甚恕之云若破賊而喜在謝安固不足
怪然屐齒必不為一時遑遽而致折也安知
其非偶然乎予以為新亭之迎如坦之亦一
時名流且喘汗不暇手板倒執公獨從容談
笑以折逆溫驕僭之氣及符堅舉百萬之師
壓境公方命駕出游夷然無懼違衆舉親卒
成肥水之功其識與量當時豈有出其右者

蓋未可以輕加俗喙也

蔭補之流狃於富貴多不知學里巷之事或不能諳一旦授之以政將何所措其手乎宋制必由試藝乃得蒞官其言曰不惟為國造士是乃為臣立家 國朝於大臣子孫文則養之冑監武則養之武學可謂盡官人之妙訣矣

李商隱善屬文喜鋪陳檢閱時謂獺祭魚楊大年每作文必先令諸子搜摘故事填補之

時謂衲被故二公之文雖險語層出而乏渾雄之氣。

昔王龜齡夢觀八陣圖後改刺夔州至時適已冬暮水落沙露而所謂八陣圖者遺跡宛然在焉可見人生遭歷皆有分定彼擇官而仕擇地而處者豈非大惑也歟

文章好作禪語自是一病令狐楚作沙門碑云泥洹茶毗前輩極詞詆之黃陳詩句妙一世惜亦不能去此累黃詩中有云拽得鼻頭

迴形模彌勒一布袋鳥喚花驚只麼回更看
脚跟叅一節但得螺螄吞大象贈行百衲樂
羅襪陳詩中有云冤親併一空真成菩薩魔
猶復得聞思淨居衆天人復作空生瘦潭
光明殿慙懃三請久住世是何等語言也
荆門有伍子胥廟張南軒曰子胥吳視之為
忠楚視之為讎尚安得血食於衆惡之地耶
遂平之今吳中三高祠范蠡正此類也宋人
有彈范文云假扁舟五湖之名居笠澤三高

之首况當無邊勝地之上着此不共戴天之
仇極為切當劉清軒詩云可咲吳痴忘越憾
却誇范蠡作三高黃東浦詩云千年家國無
窮恨只合江邊祀子胥惜未有人正其義而
去之

公孫以布被脫粟取詭譎不情之譏自古迄
今無肯赦之者然漢廷大臣以奢僭敗者十
數公唯弘以節儉自全不謂之猶賢矣乎况
能躬行質素非中樂侈縱而外事矯飾以盜

名者比也何可深罪之耶

昔韓退之作皇后挽詞云鳳飛終不返劍化
會相從王介甫以為此非人臣所宜言近於
黷也然蔡京求見安妃詩云玉真軒檻煖如
春只見丹青不見人月裏嫦娥終有恨鑑中
姑射未應真其褻慢無禮將孰甚焉徽宗不
以為罪而以為樂甚哉其庸下也

國初高侍郎啓吳下詩宗也五言尤古淡可
喜其停君白玉卮一篇則全效韋蘇州贈楊

開府詩模仿太逼識者譏之常云昔事武皇
帝無賴恃恩私高云少年貧無行鄉里不見
推常云身作里中橫家藏亡命兒高云家本
吳門市英風慕要離常云武皇昇仙去憔悴
被人欺高云布衣走路傍但為衆所嗤常云
讀書事已晚把筆學題詩非才果不容出守
撫嫖嫠高云稍通鄒魯儒盡謝燕趙兒焉知
事益謬空言竟無施然旣祖其意兼襲其詞
祇為人奴耳

予少時不解漢文帝履不借以視朝之說遂疑不借二字為誤後讀古今注始知不借山履也以其輕賤易得人皆自有不相假借是以名耳顏之推曰不讀天下書不得妄下雌黃真後生之藥石也歟

五代劉隱女曰素馨死其墓生花甚香因以女名目之元人詩所謂漢宮有女號素君歿而墓花香若熏是也

宋時女婦之有文者李易安為首稱易安名

清照元祐名士李格非之女詩文典贍無媿
於古之作者詞尤婉麗徃々出人意表終宋
之世未見其比所著有文集十二卷漱玉集
一卷然不終晚節流落以死天獨厚其才而
畱其遇惜哉

祠山張大帝䟽淫瀆化而為狝與禹治水時
化熊事絕相類恐皆好事者為之也

龍門子曰四皓陳畱南其振世之人豪哉蓋
其心以救民為急初何心於天子之貴乎予

謂四皓非嵩南比也。春呂后之餌奔走旬日，
碩為太子死，不翅惠帝之與隸然。翼翼成亂階，
劉氏幾不血食。倚人豪哉。

丙吉不問鬪傷而問牛喘，時以為知大体。夫
殘人之生者，上千天和，下紊國紀，尚可謂細
事乎？且一婦寃而有三年之旱，未為無繫於
陰陽也。神爵五鳳之間，幸無事耳。借使殺傷
不止，災變四起，而相君曰：「我能燮理，將何補
於危敗哉？」華言誤事，此白面之所以取嘲也。

虞世南曰不讀易不可為宰相愚則曰周禮
春秋不可不讀也文中子論周禮曰如有用
我執此以往程子曰春秋者五經之斷案侍
周禮以為經持春秋以為權相業必可觀矣
否則何以異於世之庸俗吏哉

抗言高論不避砧斧固非豪傑不能也其視
沈默謹畏緘口成風者誠懸異矣若遽以為
得計而悻々然誇張傲睨亦未為得也歐公
之貶夷陵坐貽書責若訥其舉亦奇矣又遣

書師魯安道拳、以傲逸狂醉為戒豈非幾
進於道者乎然其中有云今日始覺有遷謫
意又云昨因叅轉運作庭趨始覺身是縣令
矣蓋亦未能忘情於其間是猶落第二義也
梁元帝詩曰白鳥翻帷暗丹螢入帳明白帖
云丹鳥夜照的、熠、劉禹錫蚊詩云羞尔
微形飼丹鳥崔豹古今注云螢火一名丹鳥
金樓子云齊桓公卧於栢寢曰今白鳥營、
是必飢耳是皆以白鳥為蚊丹鳥為螢也其

說雖無經傳可據而古人則多用之

楊子雲作太玄以擬易先儒已有屋上架屋之誚予嘗得而讀之皆拘拘於句法之蹈襲字訓之模倣信乎其不作可也易以八為數推之而為六十四玄以九為數轉之而為八十一易有元亨利貞玄有罔直蒙酋冥易有彖玄有首易有爻玄有贊易有象玄有測易有說卦序卦雜卦玄有數有衝有錯易曰雲從龍風從虎玄則曰風識虎雲知龍易曰闢

戶之謂乾闔戶之謂坤玄則曰闔天之謂宇
闔宇之謂宙其他率多類比亦何取於玄哉
及讀桓譚新論又知一三九之數亦老子之
緒餘也而張衡謂其與五經相擬陸績宋衷
范望王涯之徒尤酷嗜之溫公至謂叩之以
萬物之情而不漏測之以鬼神之狀而不違
槩之以六經之言而不悖是皆溺於所好未
得為公論也

裴晉公臨薨上平准時所賜玉帶口占奏狀

云內府之珍先朝所賜旣不敢將歸地下又不敢留在人間王魏公疾革時真宗臨視賜白金五千兩公召楊大年作讓表又自書四句曰已懼多歲况無用處見謀散施以息殃二公垂絕而精爽不亂如此真異人也謚之為言引也引烈行之跡也士君子身死而論定故謚法加焉其善與惡皆不容掩劉敞曰賢者取賢稱焉愚者取愚稱焉據其終始所以存勸戒也後世則不復明別淑慝唯

大臣則例賜之又多崇飾美稱畧不据其平生宋時維陳執中有榮靈之謚蓋亦百一耳聖人褒貶大義果若是耶宜肆惡者之自得也

作文寧為巧遲毋取拙速此古今不易之論故疾行無善迹枚乘所以見誚於楊子而才豪氣猛易語言往々蛟螭雜蚯蚓斯立所以取譏於韓公也若使敏而能精如顏延之受詔取成呂思禮食頃一就阮瑀據案書制祔

衡當食草奏子建之七步公權之三步王勃
之文不加點王粲之文如宿構袁宏之倚馬
荀濟之當楯竟陵王之刻燭蕭文琰之擊鉢
蘇廷碩占授腕脫齊元康運筆颯々范雲之
立就元齡之口藁裴子野之心成度子礼之
不甯薛收駐馬千言劉放立馬九制亦何嫌
於速哉荀淹之歲月之久如劉勰所謂張衡
研京以十年左思練都以一紀得無傷於鈍
乎噫騏驥以千里稱駿于將以立斷稱神否

則亦駑馬鉛刀而已矣

龍江夢餘錄卷之一

龍江夢餘錄卷之二

雲間唐錦士綱

宋曹瀚破江南日獲樂妓中一人乃南唐韓侍郎熙載之女翰以禮遣嫁印應雷知永嘉時開宴得一妓乃趙清獻之後印憫之為具資裝以適士族元姚丞旨燧於玉堂設宴見樂妓有操南音者詢知為西山真公之後亦與落籍嫁之夫熙載方貴盛時已坐帷箔不修之罪責授太子右庶子分司南都其女有

此固不足異但清獻西山之後何乃至於此乎然終遇數公以歸於正亦天也

周秦以下兵制唯唐初與三代畧同天下凡十道置府六百三十四而在關內者殆半關內府幾三百而在京兆者又居其半此為得居重馭輕之道又以無事而耕有事而戰宛然三代遺法也其後一變而為彊騎再變而為方鎮始與先王之制大相背馳卒之與唐俱亡而後已耳

昔王子充云鷄好噬蜈蚣。鷄死蜈蚣輒入腹。咬之不置。驚被蚊嘅。無不立斃。而人欲辟蛟者。粉蠶甲骨。焚之。蚊皆避去。即不去。無能生存者。予讀之。深有感焉。夫鷄之死。豈意見食於蜈蚣。而驚亦豈知能以死骨殺蚊哉。蓋物理之相報。自有不期而然者矣。

石介作怪說二篇。其一專斥老釋。其一專斥楊文公。夫以中國之人。去其父母。棄其常業。襲其冠裳。以從事於夷鬼信。為恠之大矣。若

楊公者文藻敏贍搖翰雲飛與王文正寇忠
愍為知己以道相許范公謂其有命世之才
歐公稱之為一代文章之豪雖其綴風月弄
花草之弊或不能免如力通青海求龍種元
諸文咸食馬肝等作亦自奇偉不凡擬之韓
柳歐蘇稍有媚色至如魯南豐宋景文輩固
將與之並驅而爭馳也乃斥之為侏人豈理
也哉 國初王宗常遂踵其說作文妖以斥
楊維禎噫文法有正有奇各展所長柰何欲

強人使必同於我也

常山有蛇名率然觸其首則尾至觸尾則首至觸腰則首尾俱至揚州有獸名果然人獲一果然而數十果然皆可得蓋果然重其類雖殺之不去也世乃有骨肉之親而忽然忘情者曾蛇獸之不若矣

王允不欲蔡邕成漢書云武帝不殺司馬遷使作謗書然今之漢書雖非邕筆而王允傳竟何如也人亦何苦用是心哉

古之酒禁甚嚴周禮有萍氏之禁司覈之令
酒誥一篇至謂盡拘執以歸于周予其殺蓋
沿其沉湎浸漬敗德傷性也聖人所以曲為
斯氏之防者至矣漢法三人無故群飲則罰
金文帝賜民脯以適一時之歡景帝亦有沽
酒之禁其意雖微異于古然亦無他止恐耗
米穀敗有用為無用耳武帝之世桑弘羊輩
以販易賤夫不知國體所在乃建榷酒之利
置官自賣導民淫佚始與古制大相背戾而

崇本抑末之意蕩然盡矣楊子雲曰譬諸父子為人父而推其子縱利如子何卜式之云不亦匡乎至趙宋之季朝廷設法賣酒所在官吏張樂集妓女以誘小民其害教傷理為益甚矣

歐陽公極喜梅聖俞詩恒自以為不及每體中不康取聖俞河豚詩誦之輒佳又屢書以示人為奇贈然河豚詩前輩頗譏之且宛陵集中勝此篇者甚多而歐公所甚稱賞者

顧在於此何耶

昔梅溪王公江行遇風舟不能進魚肉蔬菓之味俱絕無以為情日暮有小舟破浪而來賣紅鹽魚及鮓舟人爭買之公亦買以薦酒乃作買魚行其末云但願年豐魚米賤欣然醉飽同天下蓋與老杜大庇天下寒士俱歡顏樂天與君都蓋洛陽城之句雖工拙不侔同一博施濟衆之心也

徽宗即位之初深屬意於范堯夫遣中使賜

銀合茶藥至貶所從其入覲且曰范純仁得一識面足矣不幸而天不假年尋以老疾不起於是始有曾布蔡京之命向使范公無恙必且大拜靖康之禍豈至若是烈耶忠良死而奸雄柄用蓋亦數之不可逃者耳

張龍公與鄭祥遠爭礪之事予嘗疑其恠妄以為凡史傳所述神異事大率附會耳不知歐公何獨深信之云嘗以事過其祠下見林樹陰蔚池水剗然誠異物之所托歲時禱雨

屢獲其應夫歐公天下大儒學者所宗罔不
敢議然於此論竊有感焉

孔雀以聞雷而孕兔以感月而孕螣蛇以感
而孕鸛鵒以足交而孕鵲鵲以目交而孕鷺
交頸而孕鳥傳涎而孕鶴履跡而孕鵲擊目
而孕鷺相逐而孕鵲傳枝而孕此鳥獸孕育
之異者也天地之氣不能常者有如此夫
陳全父云光武降銅馬單騎按行示以赤心
不必封雍齒而降者自安也人有言馮異者

以其章示異信任愈篤不必獄蕭何而其誣
自明也愚謂二事真出高帝之上而世或未
之信焉可為嘆息也

勢在而附勢去而散自古患焉不特今也長
平之吏移於冠軍魏其之客移於武安至翟
公遂不能堪之乃大書其門然君子處小人
正自不必爾也善乎譚子之告孟嘗君曰願
君勿怨請以市論朝而盈焉夕而虛焉非朝
愛而夕憎之也求在故往亡故去耳柰何怨

之哉

古之所謂碑者乃葬祭之時植一大木所用
以統紼麗牲耳不可為文章之名也後世易
之以石已失古制孫何嘗著論辨之然有名
公鉅儒為人作碑文而往、直書其首曰某
公神道碑是皆考索不精恐不免見笑於孫
公矣

吳中呼道士之有室家者謂之火居然亦有
所本也唐鄭熊番禺雜記載廣中僧之有妻

者名火宅僧

唐武宗自稱承道繼玄昭明三光弟子南岳
炎上真人宋徽宗自稱奉行玉清神霄保仙
元一六陽三五瓊璣七九飛元大法師都天
教主嗚呼大君者為天宗子舉一世民物而
主之顧不尊且大乎乃自棄之而甘心於邪
鄙荒恠之稱蓋下愚之所不為也

小說之家乃各書所見如梅聖俞碧雲騶錄
中論范文正公云仲淹收籠群小鼓扇聲勢

知鄧青杭三州其政大可笑結吏人范仲尹
為族第而利其資論文潞公云彥博陰受教
於張貴妃明日希旨上殿乞獨身破賊以是
有平章事之拜夫二公盛德可以師表百世
雖敗夫牧豎皆能道之而聖俞又素號謹厚
與六一公為友乃所見若此豈其知果敗夫
牧豎之不若哉縱與二公或有私隙亦不宜
為是叛道之言以自取罪於名教也

胡文穆記李白三帖其一云乘興踏月西入

酒家不覺人物兩忘身在世外其二云夜來
月下卧醒花影零亂滿人襟袖疑如濯魄於
冰壺也其三云樓虛月白秋宇物化于斯憑
闌身勢飛動非把酒自忘此與何極予亦見
其一帖云吾頭惜不試書此不能自辨賀生
為我讀之雖其字跡真贗有不可必者然詞
語豪爽趣韻自別信非太白不能道也
錢之為言泉也所貴乎流通不滯也苟聚而
不散禍之因耳於是乎有水火之災於是乎

有盜賊之患於是乎有訟獄之擾於是乎有不肖子之累卒歸於烟消漸盡而已矣予嘗見富家翁朝營夕謀凡可以專寵斷之巧規刀錐之利者必強擅之以是富聞於人一旦群盜席卷而去則凡所以焦思而苦心者適為他人之地耳是乃盜賊之奴矣不亦可哀也哉何若散其所餘以廣惠於親舊之窘迫者德施於我而責報於天子孫必將食其報矣何不可之有

口之於味雖所嗜不同亦唯其佳者好之然
劉雍嗜瘡痂以為味似鰻魚權長孺嗜人爪
得之如獲百金鮮于叔明嗜臭虫云此味甚
佳其去人之性遠矣

予嘗與同年王見齋節推論史見齋云秦始
皇以驚悍聞君天下者恒耻言之然有百世
不能改而留議吾道者二事稱皇帝與立郡
縣是也竊謂此論前輩所未及因記之
世徒知髡首緇衣為吾道之賊而不知章甫

其冠褒博其服者有大盜焉張商英其魁也
商英為學士宰相顧乃自叛其教而唯佛之
佞自號無盡居士及作護法論凡韓退之歐
陽永叔程伊川王逢原排斥異端者則極詞
詆之反謂儒者勞心而佛者安心儒者誼譁
而佛者純靜儒者求名而佛者求道儒者爭
權而佛者隨緣儒者有為而佛者無為儒者
治外而佛者治內儒者該博而佛者簡易是
欲率天下之人棄儒而盡歸於釋也使其說

行則百年之後化機已息併其所謂佛者而
亡之矣尚安有人類耶赤眉云盜不過殘一
時民命耳商英之說實蠱萬世之人心不謂
之大盜吾弗信也

儒者多執古不墓祭之說雖朱子亦謂神主
在廟而墓所藏形體耳故不宜祭然周禮已
有冢人之官凡祭於墓則以為尸蓋此禮始
於周公豈得謂之非古也耶且孝子於故衾
遺履尚當起敬形體所在拜而祀之禮不為

過縱使上古所無當以義起矧周公之文明甚而可棄之以自陷於薄哉

唐人撰白猿傳以為歐陽訖妻為猿所竊生子詢是蓋起於無忌盡此一彌猴之句而惡詢者遂造此以辱之其不足信明矣

虞文靖公集在翰林嘗夢孔子語之曰汝集好為之前輩薛公瑄夢朱子告之曰少嗜欲多明理江西吳興弼亦嘗夢孔子訪之予初嘗致疑其間以為夢生於思平居既無半面

之雅豈得感諸夢耶倘一日夢至大殿見鼻
而冠者南面危坐其色如赭時與予同行者
數人相告曰請拜東坡以此知三公所夢亦
非虛矣蓋或平居傾慕旣深故精神流通不
覺形諸夢寐耳

臯逢鳩人曰子將安之臯曰鄉人皆惡我鳴
將東徙鳩曰子能更鳴可矣不能更鳴東徙
猶惡子之聲世有惡人焉一國非之而不顧
天下非之而不顧方且揚眉吐氣侈然自得

以為人莫予敢侮也既不能更鳴又不知東
徒則又梟之耻矣

雲間陸尚訥國初詩人也其題二喬面詩有
云無非無儀婦人職君臣玩色非良謨平生
嬾題婦人畫何處別有曹娥面高季迪明妃
詞云妾語還憑歸使傳妾身沒虜不須憐願
君莫殺毛延壽留畫商巖夢裡賢二詩造意
甚新蓋題咏婦人須不為脂粉所污乃可名
家耳

潤筆之說昉於晉宋而極盛於唐元和長慶間墓碑廟記爭以得韓文為榮故禹錫祭愈文云一字之價輦金如山蓋實錄也李邕文長碑頌受饋遺亦至鉅萬皇甫湜在裴公幕下為作福先寺碑度贈車馬繒綵甚厚猶大怒索縑九千乃止樂天與微之情好如昆弟及作元墓銘尚酬以臧獲輿馬綾帛銀鞍玉帶之類價當六七萬則他可知矣宋太宗時又立潤筆錢數降詔刻石于舍人院每朝謝

日移文督之是辱導之以利不可為法也
赦也者小人之幸而君子之不幸也三代以
上無聞焉故王符曰賊良民之甚者莫大於
數赦數赦則惡人昌而善人傷矣李泰伯曰
苟以不忍而赦之則殺人者無以懲其惡被
殺者無以伸其冤不近於帥賊而攻人者乎
劉伯溫曰赦德令也其意在乎生而殺人之
道存焉夫前輩立言垂訓夫豈苟哉其必有
所見矣而沾沾之徒直謂此出於惻隱不仁

廢也於乎均惻隱也何獨不推之於被殺者乎其所利者小而所害者大矣是固今日聖君賢相所當究心者也

古之童謠乃能先事而知如高山崩石自破如鳥啄桓玄目黃頭小人欲作賊之類毫髮不爽傳稱熒惑之精下散而為童謠理或然也

蔡公性本豪侈平居未嘗點油雖溷軒馬廐必用蠟炬所過驛舍燭淚成堆而溫公訓儉

文亦謂奢侈冠一時子孫習其家風今多窮困顧以為戒然魏野所謂無地起樓臺者或惜其不足於儉而因以諷之也近時場屋中遂指為成跡往々發為問目以之策士此諺所謂痴人前不可說夢也噫果能平其政行闢人可也豈必作此寒乞相始為佳士乎唐張燕公患多讀少記後得紺碧大珠一顆握以自照而平生所讀所記了々不忘予謂此亦理之所無而前輩所載不敢深詆安得

起張公於九原以質其所謂絀珠者哉

寶祐四年策進士召王應麟覆考理宗欲易第七卷置於首應麟讀之乃頓首曰是卷古誼若龜鏡忠肝若鐵石臣敢為得士賀遂寘首選及唱名乃文天祥也以言取人孔子難之而應麟獨有得於天祥可以為難矣得非有陰相而默啓之者耶

唐宰相李公垂少時讀書佛寺一日熟寐舍前丹柰方實有蛇據其上會僧至驅之蛇入

李懷中忽不見及覺問之荅曰適夢在樹間
食柰甚美僧大奇之昔杜預魯用詢蔡君謨
皆有化蛇之異說者以為異人之生多物精
所感不偶然也予竊疑之立天地而異萬物
者莫靈於人而蛇又物之毒穢可惡者也人
同中和之秀豈不足一兆機緘於接與乃必
假穢惡之物以為神乎

陸放翁天資慷慨喜任俠以詩文自許晚年
為韓侂冑所起大節已不足稱及為韓作南

唐記自謂無諛詞無侈言而記中乃云勤勞王家勲在社稷後如忠獻之盛而又謙恭抑畏拳拳志忠獻之志不忘是果非諛詞侈言也耶

王維在當時以詩畫得盛名豪貴皆虛左而迎而維方以前身畫師自居不復知世有大忠大節卒之背主事賊恬不知耻蓋其平生志趣固在彼而不在此也善乎程子之言曰綠野堂宜為後人所存若輞川庄雖據而有

之可也

曹孟德自言噉野葛至死許飲鴆酒一盞噉
屎亦人耳其腸胃豈得獨異於人噉葛飲鴆
未有不裂肝潰腸者也操將誰欺乎蓋負人
已多恐人報已故揚先聲以誰之使知其毒
所常試不繼以此相害耳豈可謂信然哉
今醫家以文蛤為五倍晉書云智昏文蛤似
非五倍也沈存中云文蛤即吳人所食花蛤
恐亦未是

茅山龍池中其龍如蜺蜺而五色自昔嚴奉
宋大中祥符中勅取龍子以觀御製歌送歸
黃冠之徒競詫其神明道先生恐其惑世嘗
捕而脯之龍亦竟不能神也

唐李藩在瑣闥凡詔勅有不便於事者以筆
塗而進之謂之塗歸頗涉於不敬不可為法
也宋時繳奏之制但書紙尾曰未敢書讀謹
具封還乃為宛曲得體

子建髑髏說一篇其步驟節奏全祖莊子至

樂篇無一詞一意自己出也甚為高才之累
鄉村貧戶生子多者以食不能周往々棄擲
之絕父子之恩傷天地之和非細故也因思
宋時設慈幼局許抱至付乳媪育之他人有
無子者許取之於局此亦先王仁政之一端
也惜其止設於京師而不能徧於四方為惠
狹而不廣耳

樊崇輩卓發漢陵溫韞發唐陵楊璉發南宋
會稽諸陵噫人之不仁一至是哉

古者此卜之法不獨著龜見於書傳者尚有
錢卜紫姑卜烏卜牛蹄卜粟卜羊卜灼骨卜
瓦卜雖不出於聖人要之亦有可稱者焉
昔之學江西詩者謂蘇不如黃又謂韓歐二
公詩乃押韻文耳王龜齡大不平作詩辨之
於韓云碑淮頌聖十琴操生民清廟離騷詞
春容大篇騁豪怪韻到窘束尤瑰奇於歐云
渾然天成無斧鑿二百年來無此作於蘇云
曾中萬卷古今有筆下一點塵埃無真萬世

之公言也誰敢有異議哉然於蘇又云和陶
之詩又過陶少陵相逢亦應避夫詩至陶杜
豈有能過之者耶此則詞浮於實恐議者有
以藉口矣

人言好名與好利均為此心之累然亦自有
不同未得為定論也此說蓋起於莊子駢拇
篇云伯夷死名於首陽之下盜跖死利於東
陵之上二人者所死不同其於殘生傷性均
也嗚呼一夷跖齊名利正老莊欺世之術耳

豈吾儒所宜道耶前輩有言曰好名則有所
不為好利則無所不為矣真名言也使莊生
聞之亦當心醉

唐鄭尚書權以媚中人得節度嶺南韓公贈
序有為仁不富之語大為洪邁所譏噫韓公
豈獻諛者哉蓋廉則可以威遠故借是語以
藥之也此文作於公之晚年而氣不少衰高
簡頓挫如狡猓號風有百獸辟易之氣王仲
謀云送鄭權序纔五百餘字令人讀之抵一

部嶺南方志覺海氣拂々來逼人矣信哉
虎畫地以卜食狼倒立以卜所向鵠巫步以
禁蛇鵠禹步以解難鵠鵠水啄木畫符此
則鳥獸之靈智也

龍江夢餘錄卷之二